

西陲要略下卷 卷之四

前史官壽陽祁韻士鶴臯輯

土爾扈特源流

土爾扈特舊爲四衛拉特之一徙居俄羅斯境其俗重黃教置鄂拓克設宰桑悉同準噶爾乾隆三十六年其汗渥巴錫等率全部來歸受封爵先是康熙年間有阿玉奇汗名最著慕天朝威德曾通貢

聖祖仁皇帝遣侍讀圖麗琛等假道俄羅斯往宣

西陲要略 卷四

一

諭而俄羅斯故爲紆繞其程凡行三年又數月始反命圖麗琛有異域風土記紀其事阿玉奇之父曰棚楚克其祖曰書庫爾岱青其曾祖曰和鄂爾勒克其高祖曰卓立甘和鄂爾勒克其高祖之父曰貝果鄂爾勒克以上世遠無可攷自貝果鄂爾勒克至和鄂爾勒克皆單傳和鄂爾勒克有子六人一卽書庫爾岱青餘三無子其二有子孫皆式微無足傳書庫爾岱青子四人絕嗣者二其一卽棚楚克是爲汗渥巴錫之曾祖其一曰那木策楞是爲郡王巴木巴爾之曾祖阿玉奇有子八人

其六皆無嗣其一曰袞扎布是爲親王策伯克多爾濟之曾祖其先世之徙俄羅斯也蓋自阿玉奇之曾祖和鄂爾勒克始其時四衛拉特各自爲汗無所統屬和鄂爾勒克與準噶爾巴圖魯渾台吉不睦率子書庫爾岱青等北徙俄羅斯屯牧額濟勒河倚騰吉思巨澤所居地曰瑪努托海時阿玉奇尙在襁褓以巴圖魯渾台吉乃其外祖被留不遣後書庫爾岱青往西藏還至準噶爾始索阿玉奇以歸其額濟勒之境北界俄羅斯南界哈薩克東界哈喇哈爾榜西界圖里雅斯科以鄰牧互

市皮馬俄羅斯嘗與雪西洋及西費雅斯科戰士爾扈特以兵助之厥後稍就弱俄羅斯因稱爲已屬然本附之非降之也迨渥巴錫之父敦羅布時俄羅斯益征調師旅不息繼復徵子入質不堪其虐而俄羅斯又屬別教非黃教比故渥巴錫與合族台吉密謀挈全部歸順中國以息肩焉其遠族有舍稜者曾以計誘害我副都統唐喀祿懼誅逃往額濟勒至是亦隨渥巴錫來歸以乾隆三十五年冬自額濟勒啟行歷哈薩克繞巴勒喀什淖爾戈壁于次年六月始至伊犁之沙拉伯勒界凡

八閱月歷萬餘里本有戶三萬三千有奇口十六萬九千有奇及抵伊犁僅存其半且皆饑餒狀甚憊高宗純皇帝鑒其歸順之誠撫而納之且爲贍其生所以優恤之者無微弗至事具

御製記中甚詳封汗一曰渥巴錫親王一曰策伯克多爾濟郡王二曰巴木巴爾三曰舍稜貝勒二曰默們圖曰恭格貝子三曰沙喇扣肯四曰旺丹色布騰五曰雅蘭丕勒輔國公一曰拜濟呼扎薩克台吉四曰達木拜曰德爾德什曰扎爾桑曰諾海餘皆以次遞授爵秩有差渥巴

西陲要略

卷四

三

錫同族設十扎薩克爲烏訥恩蘇珠克圖盟稱舊土爾扈特舍稜族設兩扎薩克爲青色特啟勒圖盟稱新土爾扈特恭格雅蘭丕勒諾海本和碩特族其先亦徙俄羅斯今偕渥巴錫來歸其同族設四扎薩克爲巴圖色特啟勒圖盟游牧之地共分五處其分駐喀喇沙爾之著勒土斯地方者爲土爾扈特汗渥巴錫和碩特貝勒恭格等部衆游牧東南界喀喇沙爾城西北界伊犁之納喇特達巴罕東北界烏魯木齊南山西南界阿克蘇庫車其分駐伊犁之東精河地方者爲土爾扈特貝勒

默們圖等部衆游牧東界精河城南界伊犁圍場哈什山陰西北與伊犁屬之察哈爾游牧連界其分駐庫爾喀喇烏蘇之濟爾哈朗地方者爲土爾扈特郡王巴木巴爾等部衆游牧東與瑪納斯卽綏來縣西界接壤北與塔爾巴哈台之沙喇布拉克地方連界南界奎屯溝西界托多克軍台其分駐塔爾巴哈台之和博克薩里地方者爲土爾扈特親王策伯克多爾濟等部衆游牧西南與彼處所屬之察哈爾厄魯特連界西北與哈薩克連界東南皆戈壁荒山東北界噶札勒巴什淖爾與

西陲要略

卷四

四

科布多之烏梁海接壤此四游牧卽所謂舊土爾扈特及和碩特皆屬伊犁將軍統轄者也其新土爾扈特游牧則分駐科布多所屬阿勒台地方隸科布多參贊大臣專轄此外有杜爾伯特部汗王貝勒貝子公台吉凡十四扎薩克游牧烏蘭固木又輝特兩扎薩克台吉均隸科布多以其皆爲四衛拉特之遺故併叙之

哈薩克源流

向傳哈薩克爲古大宛國非也漢書言大宛有城郭而今哈薩克則隨畜徙牧與大宛異俗且距伊犁西北二

面伊犁爲烏孫故地證以漢書所言烏孫西北與康居接之文則哈薩克當卽古康居國詳見

高宗純皇帝御製集中其部有三曰左部曰右部曰西部其實東中西耳距京師萬餘里向爲準噶爾所阻未通聲教乾隆二十二年大軍追勦叛賊阿睦爾撒納直入其境哈薩克謀擒之以獻其左部汗阿布賚稱臣內屬受封爵尋遣使扎噶喇等入貢是年秋參贊大臣富德率兵追捕準夷餘黨哈薩克錫拉至右部境會其與塔什罕部構釁互攻方背水決勝因遣侍衛蒙古爾岱

西陲要略

卷四

五

單騎入其陣宣諭

威德哈薩克稽顙聽命而塔什罕回目亦悔悟息爭右部汗阿布勒比斯卽日遣使入貢其書略曰右部與左部阿布賚同爲雄長今得均隸臣僕請陪左部自効語極真摯使至均

賜宴優賚遣歸二十四年阿布賚遣其從子俄羅斯蘇爾統入

覲蘇爾統者其汗近族之貴稱猶準噶爾所謂台吉也二十五年復遣從子都勒特赫勒蘇爾統入

覲

上慮其道遠不能急馳傳

諭緩程而行於十月初旬至熱河而蘇爾統以九月三日  
至烏里雅蘇台啟行月之十八已抵波羅河屯奏言  
途中驛騎餼糧極蒙優恤不致跋涉之勞急欲瞻覲  
天顏以抒誠悃

上優獎之其同來之陪臣鄂莫爾色楞伯特爾皆乞留  
充

宿衛

西陲要略

卷四

六

命爲乾清門侍衛二十八年西哈薩克啟齊玉蘇部之  
努喇麗汗巴圖爾汗烏爾根齊部之哈雅布汗同遣使  
奉表貢

賜賚如左右二部例三十四年阿布賚遺子幹里蘇爾  
統等阿布勒比斯遣子卓勒齊等先後入

覲

宴賚有加四十七年阿布賚卒

上念哈薩克誠心歸順歷久益虔卽封阿布賚之子幹  
里爲汗尋遣其弟沙海蘇爾統來謝

恩阿布勒比斯亦遣子噶岱八

覲並

賜宴賚嗣西部努喇麗汗遣子阿布賴蘇爾統來貢卒於途陪臣哈喇托霍代至亦預

宴賚蓋自哈薩克向化輸誠以來備極恭順朝貢至今不絕云所部本回種而游牧散處無屋宇定居其屬雖設鄂托克以頭目領之然攘竊成風漫無約束卽其汗亦不能禁止風俗大抵與回人相似惟不知禮拜諷經之事宴會以牛羊馬駝爲饌馬湏爲酒以衣多爲華美

西陲要略

卷四

七

其附近伊犁塔爾巴哈台一帶游牧者往往潛入卡倫竊馬必嚴緝懲治之每遇冬季邊外雪大許其附近卡倫牧放牲畜暫爲度冬每馬百匹例收租馬一匹每年夏秋其台吉頭目等各率所屬分運牛羊馬匹並由安集延所販氈片牛皮等物至伊犁貿易以綢緞布疋償之塔爾巴哈台亦然其初來之時各卡倫官兵查明稟報始准放入及貿易則另派官兵照料台吉頭日照例筵宴此撫馭之大略也

布魯特源流

布魯特在伊犁西南邊外有東西二部其游牧阿克蘇烏什西北及伊犁西南者爲東布魯特游牧喀什噶爾北與西及葉爾羌西南者爲西布魯特環繞近邊之地逐水草而居與外番安集延霍罕諸部接壤按漢書休循國出蔥嶺西捐毒國與蔥嶺屬西北皆當大宛大宛有城郭土著休循捐毒皆塞種無城郭今安集延卽古大宛城郭居而布魯特密邇與鄰無城郭當卽所謂休循捐毒二國者是又唐書西域傳大小勃律王其地直土魯番西去長安八千里以方域攷之亦卽今布魯特

西陲要略

卷四

八

之地詳見

高宗純皇帝御製集中布魯特向爲回部別族與中土聲教不通乾隆二十三年大軍討逆回布喇呢敦霍集占將軍兆惠以搜捕伊犁餘孽旋師會勦道經布魯特界其會長圖魯起拜等遮道自陳言向爲厄魯特所阻外王化今西域蕩平所部人衆咸願內屬乞遣大首領赴闕輸款事

聞

上以布魯特本遐荒殊域並未脅以兵威又非馭以智



術茲望風歸附納款稱臣情詞甚爲諄懇

特允其遣使入

覲用抒向化之忱比使至

優加宴賚

上復念其部畜牧爲生非若回人之習耕作盡地利雖經慕化歸誠祇令職貢效忱免其納賦布魯特感

聖恩厚亟圖報偵知霍集占被圍葉爾羌布喇呢敦自喀什噶爾往援乃以兵襲其後劫掠屬邑爲我軍應布喇呢敦懼不敢進及霍集占等敗竄布魯特兵猶攻喀

西陲要略

卷四

九

什噶爾之布喇村檄以逆賊兄弟已遁葉爾羌喀什噶爾皆底定乃止尋大軍追賊至阿爾楚爾破其伏斬馘千餘是時布魯特皆隨軍爲嚮導三十年烏什逆回賴黑木圖拉糾衆叛恐大軍進勦不克抗潛遣其黨巴布敦偕安集延貿易回人齎書幣問道赴霍罕乞援且通安集延道出布魯特揚言諸回城皆叛爲煽惑計適伯克噶岱默特遣屬赴布魯特額爾格訥薩爾巴噶什諸鄂拓克告言自烏什外他城悉安堵布魯特比齊里克齊乃誘巴布敦擒之遣其弟喀爾們縛獻喀什噶爾伏

法賊自是窘卒就誅滅布魯特俗重牲畜與哈薩克略同其部落沿邊散處凡十有七大首領稱爲比猶回部阿奇木伯克也比以下有阿哈拉克齊大小頭目皆由喀什噶爾參贊大臣

奏放給以翎頂二品至七品有差每歲遣人進馬酌賚綢緞羊隻商回以牲畜皮張貿易至者稅減內地商民三分之一其游牧之地有近伊犁界者間歲將軍遣領隊大臣親往巡查一次至常年稽察約束則歸喀什噶爾參贊大臣專轄

霍罕路程記

西陲荒服自左右哈薩克東西布魯特而外若安集延若瑪爾噶朗若那木塔什若塔什罕若博洛爾若巴達克山若愛烏罕若痕都斯坦若布哈爾諸部於古皆為大荒以西自新疆戡定以來無不向化歸誠虔奉職貢凡夫八駿四駿之馬白鷹海青之鳥以及劍斧刀匕首之器琛賚疊獻藉申悃忱見于高宗純皇帝御製詩集者不可勝紀諸部中以霍罕為最大今記其路程里數于左

西陲要略

卷四

喀什噶爾至木什卡倫九十里

有柴水草居住明伯克一名喀什噶爾回子一

名百

木什卡倫至汗玉罕六十里

有柴水草

汗玉罕至特爾勒克六十里

此處出鉛有柴水無草

特爾勒克至庫舒烏珠黑六十里

有柴水草

庫舒烏珠黑至鄂克蘇嚕爾三十里

小達巴罕一座有柴水草

鄂克蘇嚕爾至峨斯克奇克七十里

有柴水草

峨斯克奇克至色爾哩克野塞三十里

有柴水草

色爾哩克野塞至納哈爾察勒迪四十里

有柴水草

納哈爾察勒迪至伊根二十里 有柴水草

伊根至托海巴什五十里 有柴水無草

托海巴什至依克依雜克達巴罕十里

依克依雜克達巴罕至依克依雜克布拉克三十里 兩處

有水草無柴

依克依雜克布拉克至庫庫蘇四十里 有水草無柴

庫庫蘇至鐵葉爾哩葉克達巴罕下三十里 有水草無柴

鐵葉爾哩葉克達巴罕下至達巴罕十里

過嶺至色哩庫楚克七十里 有柴水草

西陲要略 卷四 十二

色哩庫楚克宿一日至塔爾噶拉克六十里 有柴水草中間沙爾

騰恩格斯亦通喀什噶爾

塔爾噶拉克至圖巴爾拉克塔木三十里 有水草無柴有坍塌土城

牆圈周圍一里之地此處是義德格訥所管阿塔布托游牧修橋路之十餘戶布魯特

圖巴拉克塔木至古勒沙四十里 有柴水草

古勒沙至圖古爾克托海七十里 有柴水草中間有噶

處達巴罕

圖古爾克托海至鄂什九十里 此處有土城一座霍罕

所此城有辦事一人名曰阿克呢雜爾又有管兵一人名曰伊爾哩扈哩又有一河名曰阿克呢雜爾卜古拉爾

水草  
無柴

鄂什至阿拉班五十里

此有城小土城一座只有西門一座

柴無  
水草

阿拉班至明圖伯四十里

有地此處是霍罕十餘戶

子住所有水草無柴阿拉班至明圖伯舊扈什齊游牧人等耕田之地

明圖伯至扈巴六十里

有回子住城一座霍罕五十餘戶

扈巴至瑪爾噶浪六十里

有回民三千餘戶再沙瑪爾

噶浪有納爾巴圖之子邁瑪迪敏統轄伊等都管伯克呢雜爾鄂布勒克色木等幫辦有水草無柴

瑪爾噶浪至阿克圖伯四十里

西陲要略

卷四

阿克圖伯至布拉克巴什八十里

中間布帕拉散阿拉

莊子五六十戶起至二百戶不等回子住所

布拉克巴什至霍罕六十里

塔爾噶拉克起自沙爾騰

什四里  
有柴水草

托海巴什至沙爾騰達巴罕之根三十里

有水草

沙爾騰達巴罕至愛哩雅瑪九十里

無水草

愛哩雅瑪至托海巴什八十里

兩中間有嶺二處有柴水草

厄魯特舊俗紀聞

昔準噶爾厄魯特未滅時分統四衛拉特皆有大台吉主之亦稱汗餘小台吉皆汗之宗屬爲之其臣下謂之宰桑大臣稱圖墨什其次稱札爾扈齊佐圖墨什理事者其汗所屬人戶曰鄂拓克台吉所屬曰昂吉猶言部分也鄂拓克游牧環其汗所居昂吉游牧環諸鄂拓克其辦理喇嘛之事曰集賽以宰桑領之守邊界之人曰札哈沁司礮者曰包沁包者礮也以鐵爲腔駕於駝背以施放者俗最重黃教凡決疑定謀必咨於喇嘛而後

行喇嘛坐牀者爲西勒圖坐牀卽掌教也人生六七歲卽令識喇嘛字誦喇嘛經病則先延喇嘛誦經然後服藥若大台吉有事諷經則其下爭輸貨物於喇嘛以爲禮衆喇嘛聚而諷經之室曰都綱噶爾丹策凌時曾於伊犁河之北固爾札河之南海努克建立都綱三層繚垣周一里許聚集喇嘛令其五鄂拓克輪值供養之謂之塔本集賽塔本言五集賽言輪值也歲首盛夏其膜拜頂禮者遠近咸集往往捐珍寶施金銀以事莊嚴廟之閔壯甲於漠北阿睦爾撒納之叛賊黨肆劫焚掠廟

乃燬廢今巴彥岱之南地名金頂寺是其遺址準夷不  
習耕作以畜牧爲業飢食其肉渴飲其酪寒衣其皮馳  
驅資其用無一不取給於牲欲粒食則因糧於回部回  
人苦其鈔掠歲賦以粟然僅供會豪饅粥其達官貴人  
夏食酪漿酸乳冬食牛羊肉貧人則但食乳茶度日畜  
牧之外歲以熬茶西藏爲要務其酒縫皮爲袋中盛牲  
乳束其口久而釀成味微酢謂之捫酒每歲四月馬湏  
新得時置筵酬神詐馬爲慶謂之玉醴斯蒙古亦然但  
不如其盛耳廬帳方位以東爲南南爲西西爲北北爲

東戶必東面猶內地之南向也飲食用碗用匕而不用  
箸其匕之制大小不同以木與皮爲之其地有樹如韃  
取其油以爲燈火云冠無冬夏之別但以毛質厚薄爲  
差白氈爲裏外飾以皮貴者飾以氈或染紫綠色其頂  
高其簷平謂之哈爾邦略如內地暖帽而綴纓止及其  
帽之半婦人冠與男子同帶以絲爲之端垂流蘇其長  
委地婦人辮髮雙垂約髮用紅帛在辮之腰帛間綴以  
好珠琴瑟之屬望若繁星呼袍爲拉布錫克台吉用錦  
緞爲之飾以繡宰桑則絲繡璫璪爲之賤者多用綠色

禦冬無棉以駝毛爲絮名庫棚亦有祇衣羊皮者皆右  
衽平袖四圍連紉男子衣不鑲邊婦人衣用棉繡兩肩  
兩袖及交襟續衽處鑲以金花其民婦則以染色皮鑲  
之台吉鞞以紅香牛皮爲之中嵌鹿皮刺以文繡宰桑  
用紅香牛皮不嵌不繡民人曳皮履或黑或黃無敢用  
紅者婦人鞞貴賤視其夫有都爾布錦者以羊毛織成  
若內地之坐褥然其文字謂之托忒共十五字頭每字  
頭凡七音共得一百五音其法直下右行用木筆書之  
或削竹爲筆長四寸上濶而下銳取墨以作書謂之烏

珠克台吉宰桑所居皆建旗纛或以綠緞或以雜色布  
幅爲之書喇嘛經咒於其上遇風展動則種福與諷誦  
等台吉之印其形圓範金爲之宰桑以下之印或以銀  
或以銅鐵錫五金備用各視其職掌以爲差等四時不  
知甲子祇以十二物紀年如歲在寅則爲虎年之類每  
歲元旦四月八日五月望日十月二十五日爲四大節  
禮佛諷經不殺生春月女子有踢鞠之戲秋月酋長有  
馬射之棚長夏親朋有馬潼之會三冬穉孩有潑水之  
樂積年置閏亦同中國但不拘月分居當閏之年宰桑



等請於大台吉隨意中所欲置閏於某月遇小建之月亦不必定無三十日隨台吉之意而中去一日焉自寅至丑每月俱可閏自朔至晦每日皆可虛也其地亦無二十四氣星家之書名珠露海男女婚姻以羊馬爲聘禮婚之日婿至女門女家諷喇嘛經婿與女共持一羊脾骨拜天地日月夫婦交結其髮女家爲設蒙古包以成婚明日婿先歸別擇日以娶婦乘馬至婿家諷經亦如之人死不立喪制子孫親屬丐延喇嘛諷經檢珠露海所載有應五行葬法則以其法葬之如應金葬則置

諸山應木葬則懸諸樹應火葬則焚諸火應水葬則沈諸河應土葬則埋諸地若不應五行葬則撤蒙古包棄尸道旁自亡日起諷經四十九日不殺生不薙髮有翦髮以爲孝者每忌日設果食湏乳以祭遇草青時子孫思其祖父亦酌奠於野至從軍失伍者冠以紙冠並令其妻服短布衣遊行示辱盜馬者罰九牛或九羊九馬給事主無牲畜者則以盜者之妻給事主以償之無妻則鞭其腰其刑罰若此所用錢名普爾回人所輪制小而厚橢圓而首微銳中無方孔面鑄準部台吉之名背

附以回字凡台吉新立輒更鑄舊錢皆銷其樂器多以馬鬃尾爲絃無用絲者絃之大小以鬃之多寡爲差亦間有皮絃者樂音大抵以絲爲主而竹附之其鼓曰鏗格爾格喇嘛諷經用之有曲曰遜雅布圖達爾者皆彼中頌禱之辭歡會宴飲所用也其俗尙之大略如此

回俗紀聞

回俗不信佛書事天爲本有禮拜寺而無像設誦經其中相傳爲排哈木巴爾裔其祖國曰默特納卽史所載默德那國也熟於經典者名曰阿渾每七日輒爲衆誦經祈福一次其紀年有地支而無天干三百六十日爲一年月無小建歲無閏滿三百六十日謂之大年大年第一日如內地元旦伯克詣禮拜寺燻前行禮殺羔祭天大小相慶賀過年節謂之入則先期三日必把齋不茹葷不殺牲把齋於日出閉關至日落星全方飲啖大

西陲要略

卷四

十九

年之前十五日謂其主下降察人善惡舉家誦經不寢達旦懸葫蘆燈於樹頭油盡燈落則踏破之以爲破除一切災咎也回字凡二十九字頭或兼數音而成一字或聯數字而成一音其字書名阿里卜占候書名嚕史訥默史名陀犁克童子能書記者謂之墨嚕至阿渾則能解其文義衆皆敬信之遇有疑難必問阿渾行止俟其一言而決卽男女婚嫁皆所主持雖謬誤不少怨悔俗忌食豕肉他牲非其人自宰殺去血淨者不食見人無跪拜之禮見尊長及伯克交手當胸而頓其首謂之

阿斯拉木惟納馬茲始跪拜納馬茲者送日西入禮拜之名然自歸化以來見內地官長皆跪拜請安蓋敬之如天日神人矣無姓氏宗譜呼婦人爲鶯哥婚姻之事婿家邀媒至女家以連襟爲詞不直言議婚旣許諾則宰一羊藉之以綢覆之以被送女家爲定前娶之三日婿宿女家而不入內居期女家延阿渾誦經以氊毯昇女出門抱之上馬至家先拜竈神潑油於竈門然後入房或半年一年新婦始去障面出見舅姑夫婦若不睦輒自離異謂之揚土爾其帽冬用皮夏用綢緞猩氊爲

頂倭緞爲翅凡官長帽頂高尺餘尋常帽頂高五寸前後翅各五寸男翅兩平女後翅少垂頂飾花紋而不綴纓牛羊之皮爲鞞爲履皆朱色女子辮髮數十嫁後一月則梳髮後垂以紅絲爲絡末綴細珠寶石珊瑚之屬貧有喪者則否所衣之袍謂之托恩大領窄袖男右衽女敞前襟內襯衫襖領無釦袖不鑲四圍連紉貴者用錦繡及貂爲之呼棉花爲白荅餅餌爲囊牛馬乳釀酒爲阿拉占酸乳爲氣格卽馬捫也樂器以鼓爲主大小不一制又有提琴洋琴之類歌舞盤旋皆以鼓爲節日

中之市名爲八雜爾每七日一集交易以內地元寶爲貴否則疑有贗僞錢以紅銅爲之一錢爲一普爾五十普爾爲一騰格量穀麥以帽數多則用他哈爾卽小布袋也大者謂之帕特瑪其人性巧善雕刻準噶爾時呼之爲和通又趨捷者善繩技蓋古尋橦度索之遺俗好育鵬鶚富者多至數十司飼養者謂之鵠師齊鞫囚之法縛置高處令足不著地以繩勒其腹不服則鞭其腰或囚之於地牢中地牢者掘地爲牢方深二丈餘以草木泥土覆之開一竇於上通飲食污穢不堪坐臥吐實

後設木架懸以示衆三日無不死者其酷特甚自投誠以來凡遇死罪之囚俱各報明處以律其罪輕者准依回俗折贖無復向之殘酷矣居喪無服制惟屏紅綠著黑布而已貧者以白布纏尸舁而瘞之富者或斂以棺其上所覆綢緞分致送葬者爲製小帽起墳多肖棺形或開穴或緣琉璃爲飾率在孔道之旁謂往來人多爲之念經祈冥福云

重印西陲要畧書後

右西陲要畧四冊分爲上下二卷乃祁壽陽相國尊人鶴皋先生所著也於天山南北疆域道里遠近建置規模無一不條列件繫經緯分明洵足資後人之考核溯書成嘉慶丁卯戊辰間松文清公時爲伊犁將軍方纂輯新疆事畧先生以謫戍相依任編次之役凡屯政兵防民風土俗悉皆身親其事目見耳聞不比博望鑿空元奘附會也已我

西陲要畧

跋

一

國家奄有西域二萬里之鴻圖邁越千古見諸欽定新疆識畧及西域圖志中者特爲詳贍每以

內府秘藏購覓匪易此則記載簡括篇帙無多而當日宏綱細目寔已綜其崖畧爰將家藏鈔本用同文館活字板重印存畧以便省覽質之同事諸友均有此意因請於

堂憲咸欣然曰可適向先生哲孫子和侍郎處丐得張石舟校勘原本細加攷訂可無魚豕之訛先生著述極富此外如蒙古游牧記蕃部要

畧西域釋地等書俱宏博奧衍信而有徵留心  
掌故者試徧取而互參之其裨益邊務豈淺鮮  
哉光緒四年歲次戊寅季秋之朔吏部郎中葉  
毓桐謹識

西陲要略

跋

二

